



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

32. Kalenderwoche – ab 08. August 2010

Wenn kee Fußball is...

Das is werglisch gomisch - vor e baar Wochn bin isch Daach un Nachd nisch vom Färnsehor weggekomm, weil Fußball gewähsn is... un jedze is kee Fußball mähr. Gahr keenor! Nisch ma Bundesliescha odor Schembjenslieg! Nischd! Ma abgesähn von de Freindschafdsschiele in dor driddn Liescha odor so. Die kannsde nisch räschnen.

Wie mor dorweeschn so als Mänsch solsche Geschnsätze vorgrafdn dud...? - das is doch werglisch erschdaunlich! Wo de Weldmeesdorschafd im Gange warn, konnd isch mir eenfach nisch vorschdeln, wie das sein däde, wennse alle sinn! Isch dachde, das muss dann e bißl so sein, als wie wenn de dod bisd. Nischd mähr los!

Abor nu... ? Isch lähbe noch. Abor es is ehm werglisch e bißl langweilisch. Die baar Nachwehn, dies noch gegähm had... zum Beischbiel die Frache, ob nu dor Jogi Leef weidormachn dud als Nadsjonaldrähnor... un ob ooch dor Bierhoff bleim dud... das warn ma noch zwee drei Daache Offräschnung in dor Zeidung - un nu is ooch das geglährd. Dor Jogi dud weidormachn.

Ma unnor uns - isch weeß nisch wie bleede eenor sein muss, wennor nisch weidorgemachd ham däde? Odor had dähr villeisch droff gebogord, dassor Drähnor bei Real Madrid wern kennde? Odor bei Red Bull in Leibzisch? Odor ob dähr villeischd nach Argendiehjen geschield had, dor Jogi? Wo dor Marradonna nisch vorlängord gegrischd had!

Währ weeß, was da hinnor de Gulissn sisch so abschbieln dud. Es kennde sein, dasses es da ooch irschendwie ums Geld gehn dud. Kennde sein!

Dann war noch dähr kleene Gnahdsch midm Ballagg - ob dähr nu Mannschaftsgabidähn bleim dud odor nisch... - abor jezde is ganz zabbndusdor. Nischd mähr los! Die baar Schbegguladsjonen, währ nu zu währm vorkoofd wern dud... - de Dransfährs - die machn das Graud nisch fedd!

In dor Zeidung un im Fernsäher hamse aus laudor Vorzweiflung iebor de Eurobameisdorschafdn in dor Leischdadhlehdig berischded. Renn, Hubbn, Schbeerwärfen un so!

Isch meschde wissn, währn das indressiern dud?

Wobei... wenn isch so e baar Jahre zuriggdenkn du... - es dad ma Zeidn gähm, da habb isch misch außor fiehr Fußball ooch noch fiehr annre Schbordardn indressierd. Fußball war ooch, abor es dad ooch Eishoggeeh gähm, un Handball, Gewischdhehm, Eisgundsloffn, un... ja, un dann dads ehm ooch ganz annre Sendungen gähm. Filme, Dogumendahrfilme aus dor Diefsee... alde Filme... Radgähbor... - guhd, solsche Sändungen duds heide ooch gähm, abor mor kommd nisch mähr dazu, die zu guggn, weil ja normalerweise Fußball komm dud. Un erschd wenn Fußball alle is, dann gugg isch ma, was die annorn noch so bring un bin dann meisdens schnell eingeschlafn. Nee, eischendlich kennnd die sisch die annorn Sendung schbarn. Die dun bloß unneedisches Geld kosdn!

Eduard Sachsenmeyer